



Pegang mandat lebih besar

Oleh Rosniza Mohd Taha
yoniza@bh.com.my

► Serdang

Ahli Majlis Perwakilan Pelajar (MPP) perlu ada rasa ingin membantu mahasiswa. Inilah diri saya dan saya yakin dapat membantu pelajar dan sahabat lain dengan mandat lebih besar tahun ini."

Demikian reaksi Mohamad Syzrul Yahya yang kembali berkhidmat dalam MPP Universiti Putra Malaysia untuk penggal kedua dengan mandat lebih besar sebagai Yang Dipertua (YDP) berbanding Timbalan Naib Presiden Kebajikan dan Pembangunan Infrastruktur bagi penggal 2014/2015.

Katanya, tempoh sembilan bulan berkhidmat dalam MPP sebelum ini sememangnya terlalu singkat untuk menabur bakti kepada warga UPM serta menimba pengalaman baharu dalam arena kepemimpinan.

Sehubungan dengan itu, katanya, kepercayaan menerjui badan kepemimpinan pelajar itu tahun ini diterima dengan hati terbuka serta tekad memurnikan dan melaksanakan agenda pembangunan serta kebajikan pelajar yang tidak sempat dilaksanakan sebelum ini.

Agenda pembaharuan

"Saya akan mengutamakan program pembangunan dengan melaksanakan aktiviti dan inisiatif yang tidak

sempat dilaksana penggal lalu contohnya kebajikan pelajar yang kurang berkemampuan serta menambah baik kemudahan pembelajaran.

"Buat masa ini, agenda pembaharuan seperti permintaan mewujudkan kompleks atau pusat pelajar bukanlah keutamaan kerana persekitaran UPM serta akses kepada kemudahan rekreasi sekitar kampus sudah memadai bagi pelajar," katanya.

Mohamad Syzrul berkata, antara inisiatif kebajikan akan digerakkan ialah mewujudkan badan penggerak asnaf di setiap kolej kediamaan bagi menjamin pasti pelajar kurang berkecukupan yang memerlukan bantuan zakat.

Kata-

nya, ramai pelajar terpaksa ikat perut dan hilang fokus kepada pengajian kerana tekanan beban kewangan tetapi malu untuk mendapatkan bantuan.

"MPP akan lebih proaktif dalam menangani hal ini bagi memastikan pelajar dapat menumpukan perhatian kepada pengajian apabila masalah kewangan mereka diuruskan," katanya.

Cabaran kerjaya

Katanya, kesediaan memiliki tanggungjawab besar itu juga berlandaskan keinginan berterusan mencari ilmu dan menimba pengalaman lebih mencabar dalam bidang kepemimpinan sebagai bekal menghadapi cabaran kerjaya yang lebih luas.

Beliau juga berharap program kesedaran yang lebih meluas

dilaksanakan di bawah kepemimpinannya kelak dapat mengelak pelajar UPM terutama yang berada dalam tahun-tahun akhir pengajian daripada tersasar haluan serta fokus menge�ai keberadaan mereka di universiti.

"Saya harap lebih ramai pelajar akan sedar mengenai siapa diri mereka dan tujuan datang ke UPM kerana apa yang saya nampak ramai pelajar mudah 'hanyut' apabila melangkah masuk ke pengajian tahun tiga dan empat.

"Komuniti UPM yang saya ingin bangunkan ialah mahasiswa yang cakna dengan pelbagai isu, berpengetahuan luas serta mantap kemahiran insaniah hingga mampu membanggakan universiti serta meningkatkan penghormatan masyarakat terhadap warga universiti ini," katanya.

PROFIL

Mohamad Syzrul Yahya

Umur: 22 tahun

Pengajian: Bachelor Sains Pembangunan Manusia (Psikologi)

Pembabitan dalam aktiviti kokurikulum:

- YDP MPP UPM 2015/2016
- Timbalan Naib Presiden Kebajikan dan Pembangunan Infrastruktur MPP UPM 2014/2015
- Presiden Persatuan Pelajar Fakulti Ekologi Manusia
- Pengarah Program Mahasiswa Penyayang 2013
- Anugerah Persembahan Terbaik Pertandingan Youth Top Motivator 2014

